

pum, et ejus canonicos seminavit, et qui fuerant A per concordiam filii, a paterna gratia facti sunt alieni, et paternus amor more solito non blanditur. Discretionem vestram per apostolica scripta mandamus, quatenus ad supradictam civitatem personaliter accedentes ad reformandum inter eos pacem et concordiam propensius laboretis, ipsum archiepiscopum diligentius inducentes, ut a corde suo conceptum rancorem amoveat, et canonicos suos paterna benignitate diligens, si quam, eundem offendendo, culpam contraxisse videntur, non ad animum revocet, sed ea ex cordis affectu omnino relaxet, et tanquam bonus pater suis filiis compati et misereri addiscat. Postmodum vero commonitionem vestram ad ipsos canonicos convertentes eosdem inducere studeatis, ut archiepiscopum tanquam Patrem, et animarum B suarum rectorem diligant propensius, et honorent et ejus correctionibus inhærendo salubribus monitis obedire procurent, et a sua non dissentiant voluntate. Demum vero (quod Deus avertat!) si partes commonitionibus vestris acquiescere forte noluerint, sed in sua duxerint duritia persistendum, audiat quæ hinc inde proposita fuerint, et secundum quod Deus vestris cordibus inspiraverit, et noveritis expedire, quæstiones inter illos exortas sine appellationis obstaculo, mediante justitia, terminetis.

Datum Laterani, v Idus Julii, pontificatus nostri anno sexto.

CCLXXIV.

Hugoni, abbati Cluniacensi, permittit, ut in abbatibus C ad monasterium Cluniacense pertinentibus, quæ secundum Deum et beati Benedicti Regulam et statuta ordinis viderit corrigenda, corrigat.

(Laterani, Aug. 5.)

[Bullar. Cluniac., 95.]

COELESTINUS episcopus, servus servorum Dei, dilecto filio HUGONI, abbati Cluniacensi, salutem et apostolicam benedictionem.

Cum a nobis petitur, quod justum est et honestum, tam vigor æquitatis quam ordo exigit rationis ut id per sollicitudinem officii nostri ad debitum perducatur effectum. Eapropter, dilecte in Domino fili, tuis justis precibus inclinati, ut in abbatibus ad Cluniacense monasterium pertinentibus liceat tibi, quæ D secundum Deum et beati Benedicti Regulam et statuta ordinis videris corrigenda, corrigere, et ibidem statuere statuenda, liberam tibi, contradictione et appellatione cessantibus, auctoritate presentium concedimus facultatem. Sententiam quoque, quam in contumaces et rebelles duxeris canonice promulgandam, ratam habentes et firmam, ipsam faciemus, auctore Domino, inviolabiliter observari.

Nulli ergo omnino hominum liceat hanc paginam nostræ concessionis infringere, vel ei ausu temerario contraire. Si quis autem hoc attentare præsumpserit, indignationem omnipotentis Dei et beatorum Petri et Pauli apostolorum ejus se noverit incursurum.

Datum Laterani, Nonis Augusti, pontificatus nostri anno sexto.

CCLXXV.

[Michaeli], archiepiscopo Senonensi, et abbati Sanctæ Columbæ mandat, cogant comitem Nivernensem ut domum de Colenges prioratui de Charitate restituat.

(Laterani, Aug. 6.)

[Ibid.]

COELESTINUS episcopus, servus servorum Dei, venerabili fratri Senonensi archiepiscopo, et dilecto filio abbati Sanctæ Columbæ in Senonensi diocesi constituto, salutem et apostolicam benedictionem.

Ex insinuatione dilectorum filiorum abbatis et conventus Cluniacensis nos accepisse noveritis, quod cum prioratus eorum de Charitate tempore quo charissimus in Christo filius noster Philippus illustris Francorum rex Hierosolymam profectus est, in penitentia et peccatis habitantium exigentibus, nimio fuisset debitorum onere gravatus, et Petrus de Croyon serviens nobilis viri comitis Nivernensis, nimium ipsos affligeret et gravaret, prior et fratres ejusdem loci domum de Colenges ad ipsum priorem spectantem, pro tredecim mille solidis inveniendis ipsi priori venditioni exponere sunt coacti; unde prioratus de Charitate damnificatus est plurimum et gravatus. Et licet ipse comes ad instantiam prædicti abbatis Cluniacensis postmodum in præsentia venerabilis fratris nostri W. Remensis archiepiscopi Sanctæ Sabinæ cardinalis, apostolicæ sedis legati, tunc curam et sollicitudinem regni Franciæ, simul cum charissima in Christo filia nostra illustri regina Francorum, matre regis ipsius gerentis, tactis sacrosanctis Evangeliiis juramento firmavit, quod priori et fratribus de Charitate reipsa pecunia sua domum prætaxatam cum omnibus pertinentiis redderet pacifice possidendam, nunquam postmodum, quamvis ipsi fratres, ut dicitur, pecuniam illam ei vellent restituere, illud quod juraverat voluit adimplere.

Cum igitur cura et sollicitudo omnium ecclesiarum sit nobis commissa, volentes indemnitati ipsius prioratus de Charitate, prout debemus paterno affectu sollicito providere, discretionem vestram per apostolica scripta mandamus firmiter injungentes, quatenus supradictum comitem Nivernensem qui eandem domum de Cobenges servientis nomine, sicut dicitur, occupavit, et in proprios usus convertit, ut ipsum servientem, si prædicta domus ei fuit restituta, auctoritate nostra monere et inducere efficaciter laboretis, ut domum ipsam prioratui supradicto, recepta ab ipsis pecunia restituta, sine difficultate qualibet restituere non omittat: et si quid in ipsa domo ab ipso comite vel prædicto serviente superædificatum est non computetur ipsis fratribus, sed de redditibus domus receptis illud fiat. Si non idem comes aut ipse serviens duxerit restituendum, vos nostra freti auctoritate tam ipsum comitem quam quoslibet alios domum ipsam tenentes, ad eandem domum cum pertinentiis præfatis fratribus per excommunicationis et interdicti sententias, sublato contradictionis et appellationis obstaculo, compelli-

latis, facientes utramque sententiam usque ad condignam satisfactionem inviolabiliter observari, nullis litteris obstantibus a sede apostolica impetratis. Quod si ambo eis exsequendis nequiveritis interesse, tu frater archiepiscopo, ea nihilominus exsequaris.

Datum Laterani, vii Idus Augusti, pontificatus nostri anno sexto.

CCLXXVI.

Cānonicis ecclesiæ S. Salvatoris Venetæ asserit ecclesiam S. Bartholomæi a Marco episcopo tributam.

(Laterani, Aug. 8.)

[CORNELII, *Eccles. Venet.*, XIV, 124.]

COELESTINUS episcopus, servus servorum Dei, dilectis filiis priori et canonicis S. Salvatoris de Rivoalto, salutem et apostolicam benedictionem.

Cum a nobis petitur quod justum est et honestum, tam vigor æquitatis quam ordo exigit rationis, ut id per sollicitudinem officii nostri ad debitum perducatur effectum. Eapropter, dilecti in Domino filii, vestris justis precibus grato concurrentes assensu, ecclesiam S. Bartholomæi pro evitatione scandali, quod sæpe inter vos et plebanum ipsius oriebatur, a venerabili fratre nostro Marco Castellano episcopo cum thesauro, libris, ornamentis, domibus et aliis possessionibus, ac pertinentiis suis pia vobis et successoribus vestris deliberatione concessam, sicut eam juste ac pacifice possidetis, et in scripto ejusdem episcopi plenarie continetur vobis et per vos ecclesiæ vestræ auctoritate apostolica confirmamus, et præsentis scripti patrocinio communimus. Nulli ergo omnino hominum liceat hanc nostræ confirmationis paginam infringere, vel ei ausu temerario contraire. Si quis autem hoc attentare præsumpserit, indignationem omnipotentis Dei et beatorum Petri et Pauli apostolorum ejus se noverit incursurum.

Datum Laterani, vi Idus Augusti, pontificatus nostri anno sexto.

CCLXXVII.

Archiepiscopis, episcopis, abbatibus, decanis, aliisque ecclesiarum prælatis mandat, ut direptores et vexatores fratrum Cluniacensium laicos excommunicent, clericos a muneribus submoveant.

(Laterani, Aug. 8.)

[Bullar. Cluniac., 96.]

COELESTINUS episcopus, servus servorum Dei, venerabilibus fratribus archiepiscopis, episcopis et dilectis filiis abbatibus, decanis, aliisque ecclesiarum prælatis ad quos litteræ istæ pervenerint, salutem et apostolicam benedictionem.

Non absque dolore cordis et plurima turbatione didicimus, quod ita in plerisque partibus ecclesiastica censura dissolvitur, et canonicæ sententiæ severitas enervatur, ut viri religiosi et hi maxime qui per sedis apostolicæ privilegia majori donati sunt libertate, passim a malefactoribus suis injuriam sustineant et rapinas, dum vix invenitur qui congrua eis protectione subveniat, et pro fovenda pauperum innocentia murum defensionis opponat.

A Specialiter autem dilecti filii nostri fratres Cluniacenses, tam de frequentibus injuriis suis, quam de ipso quotidiano defectu justitiæ conquerentes, universitatem vestram per litteras petierunt apostolicas excitari, ut ita videlicet eis in tribulationibus suis contra malefactores eorum prompta debeatis magnanimitate consurgere, quod ab angustiis quas sustinent, et pressuris nostro possint præsidio respirare.

Ideoque universitati vestræ per apostolica scripta districte mandamus, quatenus illos qui in aliquem de fratribus ipsis, vel conversis instigante diabolo manus violentas injecerint, vel res seu domos eorum, vel hominum suorum irreverenter invaserint, vel decimas laborum seu nutrimentorum suorum spretis privilegiis apostolicæ sedis extorserint, aut ea, quæ prædictis fratribus ex testamento decedentium relinquentur, contra justitiam detinuerint, si laici fuerint, eos candelis accensis, sublata appellatione excommunicationis sententia percellatis; clericos autem appellatione remota ab officio et beneficio suspendatis, neutram relaxaturi sententiam, donec prædictis fratribus satisfaciant plenarie, et hi præcipue qui pro violenta manuum injectione vinculo fuerint anathematis innodati, cum diocesani episcopi litteris ad sedem apostolicam venientes, ab eodem vinculo mereantur absolvi. Villas autem, in quibus bona prædictorum fratrum, seu hominum suorum per violentiam detenta fuerint, quandiu sunt ibi interdicti sententiæ supponatis.

C Datum Laterani, vi Idus Augusti, pontificatus nostri anno sexto.

CCLXXVIII.

Magistro Leoni, procuratori Constantinopolitano, mandat, ut episcopo Castellano (Veneto) decimas de bonis Joannis Canalo-Lupi exhiberi ab hæredibus cogat.

(Laterani, Aug. 12.)

[CORNELIUS, *Eccles. Venet.*, t. XIII, p. 223.]

COELESTINUS episcopus, servus servorum Dei, dilecto filio magistro LEONI procuratori Constantinopolitano, salutem et apostolicam benedictionem.

D Venerabilis frater noster Castellanus episcopus transmissa nobis querela proposuit, quod decimationes quæ ipsum et ejus ecclesiam de bonis, quæ fuerunt olim Joannis Canalo-Lupi de jure contingunt, eidem detinentur injusto et ipsis minus licite defraudantur. Nolentes igitur ut dictus episcopus sui juris læsionem incurrat, per apostolica tibi scripta mandamus quatenus hæredes et commissarios ejusdem defuncti ad debitam solutionem decimationum ipsorum nuntio præfati episcopi, cum requisitus fueris, faciendam per censuram ecclesiasticam, sicut justum fuerit, appellatione cessante, compellas. Volumus etiam et mandamus ut memorati episcopi in omnibus justitiis suis, et præcipue in decimis, quas sui prædecessores hactenus habuerunt, et quæ ad ipsum et ejus ecclesiam rationabiliter pertinere noscuntur, auctoritate nostra conserves in-